

Aktuelnosti:

1. Četiri općine Gornjovrbanke regije pokrenule inicijativu za izgradnju zajedničke deponije
2. Održana konferencija «Razvoj kapaciteta entitetskih saveza općina o gradova»
3. Održana konferencija u okviru IPA Programa prekogranične saradnje BiH – Hrvatska
4. Završetak projekta «Vrbas, udruženi turistički razvoj doline Vrbasa»
5. Tuzla i Vukovar potpisali ugovor o grantu sa EU
6. Potpisan Memorandum o razumijevanju između Općine Bihać i četiri općine iz Hrvatske
7. Cazin gradi centralni trg
8. Postignut dogovor oko izgradnje međuopćinskog vodovoda
9. Švedska pokreće milionski ekološki projekat u BiH
10. Općina Novi Grad primjer dobre parakse u razvoju lokalne demokratije
11. Savez uputio inicijativu za izmjene Zakona o preuzimanju, izmjenama i dopunama Zakona o zakupu poslovnih zgrada i prostorija KS
12. Savez uputio inicijative za izmjene Zakona o vodama, Zakona o zaštiti i spašavanju ljudi i materijalnih dobara od prirodnih i drugih nesreća
13. Cazin počinje realizaciju projekta izgradnje kanalizacionog sistema
14. Novi Travnik pokreće novi ciklus preuređenja užeg gradskog područja
15. Velika Kladuša pristupa izradi

GLEDAJTE svake druge subote u 13:30 sati na Hayat TV – “Moje dvorište” dokumentarno informativnu emisiju o lokalnoj samoupravi.

Repriza je ponedjeljkom u 21:00 sati.

<http://vimeo.com/user5457690/videos>

POSLEDNJI POZDRAV

AMERU ĆENANOVIĆU



**Načelniku Općine Ilidža i članu Predsjedništva Skupštine Saveza
općina i gradova Federacije Bosne i Hercegovine**

studije za izgradnju sortirnice i
kompostane

16. NEXPO Deklaracija

17. NAJAVA obilježavanja Dana
općina

Poštovani članovi i čitaoci,

Kao i do sada, obavještavamo Vas o
unutrašnjoj i vanjskoj komunikaciji i
razmjeni najboljih iskustava i praksi
kao i o različitim obukama koje mogu
doprinijeti kadrovskom jačanju
općinskih službenika.

Putem ovog biltena se možete
informirati i o drugim dešavanjima u
protekloj periodu kao što su
konferencije, seminari, okrugli stolovi
a koji mogu doprinijeti unapređenju
sistema lokalne uprave.

Ukoliko želite da se prijavite za
primanje ovog biltena možete to
učiniti tako što ćete poslati e-mail na
sljedeću adresu: dino@sogfbih.ba

Molimo vas da ovaj elektronski bilten
prosljedite svim zainteresiranim u
vašoj i susjednim općinama.

Ukoliko želite da objavite neke od
vaših novosti, iskoristite elektronski
bilten Saveza, koji je brz, efikasan i
jeftin način komuniciranja sa
javnošću.

Sa zadovoljstvom očekujemo vaše
komentare, sugestije i primjedbe.

[Kontaktirajte nas](#)

[Telefoni:](#)

033/ 216 502, 033/ 552 812

ČETIRI OPĆINE GORNJOVRBASKE REGIJE POKRENULE INICIJATIVU ZA IZGRADNJU ZAJEDNIČKE DEPONIJE



BUGOJNO, 1. april/travanj – Četiri
općine gornjovrbaske regije: Bugojno,
Jajce, Donji Vakuf i Gornji Vakuf /
Uskoplje, pokrenule su inicijativu za
izgradnju zajedničke deponije za
odlaganje smeća.

Općinska vijeća u Jajcu i Donjem Vakufu
već su podržala ovu inicijativu, a uskoro

bi trebao biti održan sastanak načelnika četiri općine na kojem bi bilo izneseno više
detalja vezanih za ovu inicijativu.

Sve četiri općine gornjovrbaske regije suočavaju se sa problemom odlaganja
komunalnog otpada a negdje se kao privremeno rješenje koriste deponije koje
nemaju upotrebnu dozvolu i nalaze se u blizini naselja i poljoprivrednih površina,
što je često dovodilo do nezadovoljstva, pa i protesta lokalnog stanovništva.

Izgradnjom zajedničke deponije problem odvoza smeća bio bi dugoročno riješen.

S obzirom na to da se radi o projektu u koji treba uložiti značajna finansijska
sredstva, a općine ga nisu u mogućnosti same finansirati, neophodna je i podrška
viših nivoa vlasti, uz mogućnost učešća i međunarodnih donatora.

ODRŽANA KONFERENCIJA "RAZVOJ KAPACITETA ENTITETSKIH SAVEZA OPĆINA I GRADOVA"

ILIDŽA, 31. mart/ožujak – Savez općina i gradova Federacije BiH, Savez opština i
gradova Republike Srpske i Međunarodna kooperativna agencija saveza općina
Kraljevine Holandije VNG-International, organizovali su danas na Ilidži konferenciju
s ciljem realizacije projekta CDMA "Razvoj kapaciteta entitetskih saveza općina i
gradova".

"Današnji skup posvećen je jačanju kapaciteta entitetskih saveza općina i gradova.
Savezi, da bi odgovorili interesima lokalne samouprave, moraju prije svega da
ojačaju sopstvene kapacitete", rekla je novinarima direktorica Saveza općina i
gradova FBiH Vesna Travljanin.

Savez općina i gradova FBiH i Savez opština i gradova RS već godinama organizuju
niz zajedničkih aktivnosti, konferencija, okruglih stolova, koje su posvećene
općinama i gradovima.

Na ovoj konferenciji predstavljene su nove usluge entitetskih saveza, to su služba
za pomoć za pravna i služba za pomoć za finansijska pitanja koje će biti dostupne
članicama saveza u narednom periodu.

Prisutni na CDMA konferenciji su imali priliku da proprate izradu novog strateškog
plana saveza općina i gradova FBiH i RS za period od 2011. do 2015. godine, kao i
da daju impute u kojem pravcu treba da se orijentiše rad saveza u narednom
periodu.

Projekat CDMA finansira Švedska međunarodna agencija za razvoj i saradnju (Sida).
"Ovo je jedan u nizu projekata koje implementiramo u BiH, a njegova
implementacija je planirana u periodu od tri godine. Nastojaćemo da razvijemo
kapacitete entitetskih saveza", rekao je direktor Švedske agencije za međunarodni
razvoj Anders Hedlung.

Fax: 033/552 810, 033/ 552 811

http://www.sogfbih.ba

http://www.partnerstvogradova.ba/

http://www.nexpo.nalas.eu

e-mail: dino@sogfbih.ba

NAŠ CILJ je informirati vas o seminarima, treninzima, konferencijama i drugim aktivnostima, koji unapređuju lokalnu upravu i kadrovsko jačanje zaposlenih u vašim općinama.

**KORISNI LINKOVI ZA
PREDPRISTUPNE FONDOVE:**

http://www.southeast-europe.net/en/

http://www.adriaticipacbc.org/

http://www.interregadriatico.it/index1.html

http://www.europa.ba/

http://www.cbib-eu.org/en/welcome/index.html

http://www.cbc.bih-mne.org/

http://www.srb-bih.org/

http://www.cbc-cro-bih.net/

http://www.programmemed.eu/

http://www.tacso.org/

http://www.euroinfocentar.ba/

http://www.balkanfund.org/

http://eurelsmmed.com/

http://eacea.ec.europa.eu/index_en.php

Današnjoj konferenciji prisustvovali su brojni gradonačelnici/načelnici općina iz cijele BiH.

**ODRŽANA KONFERENCIJA U OKVIRU IPA PROGRAMA
PREKOGRANIČNE SARADNJE BOSNA I HERCEGOVINA –
HRVATSKA 2007-2013**



SARAJEVO, 30. mart/ožujak – U Sarajevu je danas održana svečana konferencija u okviru IPA Programa prekogranične saradnje BiH – Hrvatska 2007-2013., povodom potpisivanja ugovora o grant sredstvima sa korisnicima čiji su projekti odobreni za finansiranje u okviru prvog javnog poziva za dostavljanje prijedloga projekata.

Direktorica Direkcije za evropske integracije (DEI) BiH i državni IPA koordinator Nevenka Savić na današnjoj konferenciji istakla je da je prekogranična saradnja sastavni dio regionalne politike Evropske unije.

"DEI BiH radi veoma intenzivno na svim poslovima i aktivnostima koji zahtijevaju kontinuiran rad, a pripremamo i nove projekte koji se tiču napretka BiH i izrađujemo strateški dokument koji će biti od velike pomoći u daljem procesu integrisanja. Jedan od važnijih strateških elemenata BiH u procesu integracije je prekogranična saradnja", rekla je N. Savić.

Prema riječima voditelja Operativne strukture u Hrvatskoj i državnog tajnika Ministarstva regionalnog razvoja, šumarstva i vodnog gospodarstva Hrvatske Karla Gjurašića, prekogranična saradnja je jedan od važnijih strateških elemenata u procesu integracije, a u prekograničnu saradnju Hrvatske sa BiH uključeno je oko pet miliona ljudi.

Provođenjem prekograničnog programa između BiH i Hrvatske nastoje se obnoviti nekadašnje prekogranične veze i aktivnosti na način da se doprinese rješavanju zajedničkih društveno - gospodarskih i ekoloških pitanja, rečeno je na današnjoj konferenciji.

"Prvi poziv za dodjelu projektnih prijedloga objavljen je 2009. godine, a rezultovao je sa više od 100 prijavljenih. Nakon završetka procesa ocjenjivanja prijavljenih, ugovoreno je 13 projekata, a 14. je u proceduri", rekla je djelatnica za ovjeru programa u Hrvatskoj i direktorica Agencije za regionalni razvoj Republike Hrvatske Željka Kovačić.

Korisnici bespovratnih sredstava čiji su projekti ugovoreni u sklopu Prvog poziva na dostavu projektnih prijedloga predstavili su svoje projekte: "STONE", projekat koji je ugovoren sa razvojnom agencijom Splitsko-dalmatinske županije iz Hrvatske i Razvojnom agencijom Zapadno-hercegovačkog kantona iz BiH, "Public Energi Management" koji je ugovoren sa Karlovačkom županijom iz Hrvatske i gradom Banjalukom iz BiH, "Innovative Networking and Economic Collaboration of Tuzla and Vukovar Regions (InECO)", koji je ugovoren sa bh. Općinom Tuzla i hrvatskim gradom Vukovarom.

Na današnjoj konferenciji je najavljeno da se Drugi poziv na predaju projektnih prijedloga očekuje u drugoj polovini 2011. godini, a njegova vrijednost će biti 5,4

miliona eura za prijavljene iz obje zemlje korisnice Programa.

Konferenciju je organizovao DEI BiH u ulozi Operativne strukture za implementaciju programa iz okvira IPA komponente II (prekogranična saradnja), u saradnji sa Ministarstvom regionalnog razvoja, šumarstva i vodnoga gospodarstva Republike Hrvatske, te uz podršku Zajedničkog tehničkog sekretarijata Programa prekogranične saradnje BiH – Hrvatska.

ZAVRŠETAK PROJEKTA "VRBAS, UDRUŽENI TURISTIČKI RAZVOJ DOLINE VRBASA"

BUGOJNO, 30. mart/ožujak –

Općina Bugojno, zajedno sa partnerskim organizacijama, općinama Donji Vakuf i Gornji Vakuf – Uskoplje, Turističkom zajednicom Srednjobosanskog kantona/Kantona Središnja Bosna i Kantonalnim zavodom za urbanizam, prostorno planiranje i zaštitu kulturno-historijskog naslijeđa, uspješno je privela kraju projekat koji finansira Evropska unija



“VRBAS, udruženi turistički razvoj doline Vrbasa”. Projekat je započeo sa realizacijom 27. decembra/prosinca 2007. godine, na osnovu dodijeljenog ugovora Evropske unije (EU) u iznosu od 272.095,20 eura, što predstavlja 85 posto ukupne vrijednosti projekta, saopćila je Delegacija EU u BiH. Preostali dio sredstava je osigurala općina Bugojno i partnerske organizacije.

Rezultati više od dvije godine rada na realizaciji projektnih aktivnosti ukazuju na dugoročne efekte postignutog učinka na dalji razvoj turizma projektnog područja i šire regije.

Između ostalog, izrađene su situaciona analiza i opsežna studija razvoja novih turističkih produkata, urađena su poslovna i marketing strategija daljeg razvoja turizma gornjevrbaske regije, 46 turističkih vodiča je obučeno i educirano, 12 ih je certificiralo Ministarstvo okoliša i turizma Federacije BiH; uspješno je educirano i obučeno 18 polaznika obuka za ruralni razvoj, izgrađeno je 6 odmorišta i postavljene su informativne table sa turističkim mapama regije. Zatim, postavljeno je pet tabli na ulazima i izlazima iz regije, 30 najznačajnijih lokaliteta kulturno-historijskog i prirodnog naslijeđa je obilježeno odgovarajućim informativnim tablama, kreiran je i vizualni identitet regije kao jedinstvenog turističkog proizvoda, uz web portal dostupan na više jezika.

Za Općinu Bugojno, sve partnere projekta i građane općina Bugojno, Donji Vakuf i Gornji Vakuf - Uskoplje, realizacija ovog projekta predstavljala je veliki izazov, mogućnost i šansu za sticanje novih znanja i iskustava, priliku da se identificiraju i promoviraju potencijali projektnog područja kako bi se kroz njihovu valorizaciju stvorile pretpostavke za otvaranje novih radnih mjesta i izvore prihoda za mnoga domaćinstva, žene, mlade osobe i drugu populaciju.

TUZLA I VUKOVAR POTPISALI UGOVOR O GRANTU SA EU



TUZLA, 29. mart/ožujak – Općina Tuzla i Grad Vukovar potpisali su Ugovor o grantu sa Evropskom unijom (EU) za implementaciju projekta "Inovativno umrežavanje i ekonomska saradnja Tuzle i Vukovara (InECo)", u okviru prvog poziva IPA prekogranični program Bosna i Hercegovina – Hrvatska.

Projekat je finansijski podržan od strane EU, uz sufinansiranje Općine Tuzla. Ukupna vrijednost projekta je 317.151,99 eura, u trajanju od dvije godine.

Osnovni cilj projekta je jačanje institucionalne i ekonomske saradnje gradova Tuzla i Vukovar, sa fokusom na razvoj ekonomskih sistema i uspostavljanje mreže za saradnju malih i srednjih preduzeća u oba područja.

Funkcionalni vodeći partner Projekta "InECo" je Općina Tuzla u partnerstvu sa Udruženjem samostalnih privrednika općine Tuzla, a vodeći partner iz Hrvatske je Grad Vukovar u partnerstvu sa Agencijom za razvoj Vukovara.

Jačanje institucionalne i ekonomske saradnje Tuzle i Vukovara ostvarit će se preko jačanja konkurentnosti malih i srednjih preduzeća u prekograničnom području, a posebno u oblastima novih informaciono-komunikacionih tehnologija, izvoznih i inovativnih sektora u oba područja, te umrežavanjem malih i srednjih preduzeća i institucija koje pružaju podršku razvoju ovih sektora.

Posebna pažnja biće usmjerena na jačanje institucionalnih kapaciteta za pružanje podrške novim i razvoju postojećih malih i srednjih preduzeća.

"Krajnji korisnici ovog projekta su pružaoci usluga poslovne podrške, i to Razvojno-poduzetnički centar Tuzla - Inkubator Lipnica, BIT Centar Tuzla, Poslovna zona Vukovar, te poslovni subjekti smješteni u njima i drugi zainteresovani.

Provedbom projekta, cijelo područje implementacije bi trebalo doživjeti prednosti kroz povećane poslovne aktivnosti, veće zapošljavanje i povećanje konkurentnosti malih i srednjih preduzeća primjenom novih tehnologija, novih proizvoda i usluga razvoja, povećanja izvoza i BDP-a, a time i standarda života.

POTPISAN MEMORANDUM O RAZUMIJEVANJU IZMEĐU OPĆINE BIHAĆ I SUSJEDNIH OPĆINA IZ HRVATSKE



BIHAĆ, 29. mart/ožujak – Priča o prekograničnoj saradnji Bihaća sa susjednim općinama R. Hrvatske od danas se nastavlja potpisivanjem Memoranduma o razumijevanju o uspostavljanju poslovno-tehničke saradnje na implementaciji razvojnih projekata.

Potpisom su ovo potvrdili načelnici

općina: Bihać, Lovinac, Gračac, Donji Lapac i Udbina. Načelnik Bihaća Albin Muslić ovom je prilikom istakao, da je posebno sretan zbog projekata koji mogu donijeti višestruku korist i za Bihać i općine iz Hrvatske, s ciljem kvalitetnije valorizacije postojećih razvojnih potencijala, kao i generalne opredijeljenosti za intenziviranjem društveno-ekonomskog razvoja na regionalnom nivou. Prema njegovim riječima, saradnja će se posebno razvijati u oblasti turizma, gdje ove općine zajedno nastupaju prema IPA fondovima, i to u turističkoj ponudi dva nacionalna parka Plitvice i Una.

Ove su općine zajednički pokrenule aktivnost na nivou Hrvatske i BiH o otvaranju Graničnog prelaza Užljebić-Donji Lapac, te zatražile pokretanje aktivnosti na uspostavi saobraćaja na Unskoj pruzi.

Načelnici iz Hrvatske, naglasili su da im je itekako važna povezanost s BiH preko Bihaća, te će se u skorijoj budućnosti razmijeniti prijedlozi konkretnijih projekata, na obostrano zadovoljstvo.

CAZIN GRADI CENTRALNI TRG

CAZIN, 29. mart/ožujak – Komunalno stambeni fond u Cazinu priprema raspisivanje tendera za prikupljanje ponuda najpovoljnijih izvođača za izgradnju centralnog gradskog trga u ovoj općini, u koji će biti uloženo preko dva miliona konvertibilnih maraka.

Trg Alije Izetbegovića je centralni trg oko kojeg su smješteni objekti općinske uprave i niz značajnih javnih sadržaja. Postojeće saobraćajne površine i uređenje trga ne zadovoljavaju savremene potrebe odvijanja kolskog i pješačkog saobraćaja, tako da je bilo neophodno pokrenuti postupak uređenja trga.

Prvenstvena namjera pri izradi projektnog rješenja je bila da se omogući bolja protočnost kolskog prometa sa već uspostavljenih, postojećih kolskih priključaka, pri čemu se došlo do kružnog toka kao najoptimalnijeg rješenja. Ovakva kružna raskrsnica se kategorizira kao mala jednotačna urbana raskrsnica, vanjskog promjera 30 metara.

Projektnim rješenjem formirana je pravilna kružna raskrsnica sa četiri okomita kraka, čime je riješen kolski saobraćaj, a postavljanjem trotoara uz pomenute krakove obezbijeđeno je neometano kretanje pješaka.



POSTIGNUT DOGOVOR OKO IZGRADNJE MEĐUOPĆINSKOG VODOVODA FOJNICA – KISELJAK – VISOKO

28. mart/ožujak – Iako se na projekt izgradnje međuopćinskog vodovoda Fojnica-Kiseljak-Visoko čeka već više od 30 godina čini se da bi se on, tek nakon sastanka načelnika ove tri općine održanog u Fojnici i postignutu političku suglasnost, mogao početi realizirati.

Naime, ovaj projekt vrijedan preko 20 milijuna KM od velikog je značaja za općinu Kiseljak i četiri mjesne zajednice u općini Visoko čime bi se riješio njihov problem

snabdijevanja vodom.

Za mjesec dana bi trebalo biti poznata odluka posebno formirane Komisije o tome pod kojim uvjetima će Kiseljak i Visoko dobivati viškove vode iz općine Fojnica. Općina Kiseljak, koja bi ovim vodovodom riješila problem snabdijevanja cjelokupne općine, već je davno krenula u pripreme aktivnosti za realizaciju ovog projekta. Iz Općine ističu da su već uradili projektnu dokumentaciju za trasu vodovoda dugu 27 kilometara, te da je otkupljeno i zemljište za velike rezervoare. Sada čekaju da se stvore uvjeti za pokretanje daljnjih aktivnosti na ovom projektu.

ŠVEDSKA POKREĆE MILIONIŠKI EKOLOŠKI PROJEKT U BIH



24. mart/ožujak – Bosna i Hercegovina i Kraljevina Švedska uskoro bi trebale potpisati sporazum o realizaciji općinskog programa za upravljanje čvrstim otpadom (SWM) u našoj zemlji, za koji će biti obezbijeđeno 100.000.000 švedskih kruna (10 miliona eura).

Vijeće ministara BiH je na današnjoj sjednici dalo odobrenje za potpisivanje ovog sporazuma, te za potpisnika ovlastilo ministra vanjske trgovine i

ekonomskih odnosa.

Kako saznajemo u Švedskoj ambasadi u BiH, program će trajati četiri i po godine i provodit će se u dvije faze. Prva faza programa ubuhvatat će 13 općina u Federaciji BiH i Republici Srpskoj koje se nalaze u blizini dva regionalna odlagališta u Zenici i Bijeljini.

Nakon prve faze od dvije godine biti će provedena srednjoročna evaluacija i revizija potencijalnih ciljeva i aktivnosti. Nove općine i regije će biti uključene u drugu fazu programa.

Formirat će se Savjetodavni odbor programa s predstavnicima nadležnih ministarstava na državnoj i entitetskoj razini, kao i drugih zainteresiranih strana za koordiniranje i nadzor cijelog programa. Na regionalnoj razini biti će uspostavljeni regionalni odbori, kako bi se olakšala koordinacija između projektnih timova na općinskoj razini.

Potpisan je ugovor sa firmom Grontmij-CarlBro AS koja će voditi nadzor nad implementacijom programa, te provoditi izgradnju institucionalnih kapaciteta.

Od ukupnih finansijskih sredstava koje će Vlada Švedske plasirati putem Švedske agencije za međunarodni razvoj i saradnju-SIDA, 7,5 miliona eura će biti usmjereno na investicije i kampanje podizanja nivoa svijesti javnosti o važnosti rješavanja ovog problema, dok će preostalih 2,5 miliona eura biti utrošeno na konsultantske usluge i izgradnju kapaciteta.

Program SWM u općinama doprinijet će integralnom sistemu za upravljanje čvrstim otpadom u Bosni i Hercegovini, te će, između ostalog, dovesti do smanjenja otpada, povećanja recikliranja, smanjenja broja divljih deponija i ostalih opasnosti za životnu sredinu.



OPĆINA NOVI GRAD SARAJEVO PRIMJER DOBRE PRAKSE U RAZVOJU LOKALNE DEMOKRATIJE

24. mart/ožujak – Evropska komisija u Briselu, sredinom marta/ožujka organizovala je seminar za učesnike devet zemalja koje su potencijalni kandidati za ulazak u Evropsku uniju, među kojima su bili i predstavnici naše zemlje.

Bosna i Hercegovina je učestvovala na nivou najuspješnijih učesnika Projekta jačanja lokalne demokratije LOD, podržanih od EU i UNDP-a u BiH, koju je predstavljala Općina Novi Grad Sarajevo, Grad Banja Luka i nevladine organizacije "MEDICA" Zenica i "GEA" Banja Luka.

Na seminaru su upriličena predavanja uspješnih lokalnih praksi, uz reforme centralnih vlasti iz Španije, Holandije, Švedske i Njemačke o potrebi decentralizacije i jačanja ekonomske neovisnosti lokalne samouprave. Nakon prezentacije zemalja učesnica, doneseni su zaključci koji idu u prilog prioritetnim projektima u korist lokalnih zajednica, kao što su reforme, decentralizacija i podizanje kapaciteta državnih institucija prioritetno općina.

"Fondovi EU će podržavati projekte koji nose pozitivne održive promjene na lokalnom nivou sa značajnim iznosom sredstava, što obavezuje i Općinu Novi Grad Sarajevo da kontinuirano provodi poboljšanja u procesima saradnje sa građanima i organizacijama civilnog društva", kazala je Hazima Pecirep učesnica na seminaru u Briselu.

SAVEZ OPĆINA I GRADOVA FBIH UPUTIO INICIJATIVU ZA IZMJENE I DOPUNE ZAKONA O PREUZIMANJU, IZMJENAMA I DOPUNAMA ZAKONA O ZAKUPU POSLOVNIH ZGRADA I PROSTORIJA KS

SARAJEVO, 23. mart/ožujak – Savez općina i gradova Federacije Bosne i Hercegovine uputio je Skupštini Kantona Sarajevo inicijativu za izmjene i dopune Zakona o preuzimanju, izmjenama i dopunama Zakona o zakupu poslovnih zgrada i prostorija.

Zahtjev je upućen danas, 23. marta/ožujka, a shodno zaključku 13. sjednice Predsjedništva Skupštine Saveza, koja je održana 24.02.2011. godine u Bugojnu.

Inicijativa, koju je pokrenula Općina Stari Grad a podržalo Predsjedništvo Saveza, ide u smjeru davanja većih prava zakupodavcu u smislu raspolaganja svojim vlasništvom u slučaju da zakupoprimac neredovno isplaćuje svoje obaveze.

Zakon je imamo za cilj da se zaštite zakupci, posebno građani koji su obavljali zanatske i uslužne djelatnosti, od zakupodavca, koji su vlasnici poslovnih prostorija. To se posebno odnosi na odredbe Zakona prema kojima se ugovor otkazuje preko nadležnog suda.

Sadašnjim odredbama tog zakona općine su dovedene u situaciju da nisu u mogućnosti da vrše efikasno upravljanje prostorima i vrše redovnu naplatu zakupnina. Zakupci u velikoj mjeri koriste postojeći Zakon u svoju korist, ne plaćaju zakupnine, a koriste poslovne prostorije i ostvaruju dobit, te na taj način stvaraju nova zaduženja sa neizvjesnim ishodom njihove naplate, zbog čega se ne može efikasno planirati, a niti upravljati budžetom.

Stoga, Predsjedništvo Skupštine Saveza usvojilo je pomenutu inicijativu i Skupštini Kantona Sarajevo dostavilo prijedlog izmjena i dopuna Zakona o preuzimanju,

izmjenama i dopunama Zakona o zakupu poslovnih zgrada i prostorija koje se odnose na izmjenu člana 28., 29. i 37. Predložena izmjena treba da omogući Općini da, u slučaju vođenja sudskog postupka za naplatu duga, gdje je neizvjesna naplata, ima mogućnost da vrati poslovni prostor da se dug ne bi dalje povećavao i da ima mogućnost da izda prostor u zakup, te da naplaćuje zakupninu za korištenje istog.

Osnovna namjera predloženih izmjena jeste da se reguliše predmetna oblast na način na koji bi se izbjeglo da zbog dugotrajnosti i složenosti postupka imamo neefikasne procedure koje u svojoj krajnjoj instanci idu u prilog zakupcima koji se ponašaju suprotno preuzetim obavezama.

SAVEZ OPĆINA I GRADOVA FBIH UPUTIO INICIJATIVU ZA IZMJENE I DOPUNE ZAKONA O VODAMA FBIH

SARAJEVO, 23. mart/ožujak – Savez općina i gradova Federacije Bosne i Hercegovine uputio je Federalnom ministarstvu poljoprivrede, vodoprivrede i šumarstva inicijativu za izmjene i dopune Zakona o vodama.

Zahtjev je upućen danas, 23. marta/ožujka, a shodno zaključku Predsjedništva Skupštine Saveza.

Naime, na **Trinaestoj sjednici Predsjedništva Skupštine Saveza općina i gradova Federacije Bosne i Hercegovine**, koja je održana 24.02.2011. godine u Bugojnu podržana je inicijativa Općine Ilidža za dopunom Zakona o vodama.

Zakonom o vodama se uređuje način upravljanja vodama unutar teritorije Federacije BiH, koji obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda kao i ostalu problematiku vezanu za vode u Federaciji BiH. Inicijativa Saveza ide u pravcu da se prihvati od vodne naknade koji pripadaju kantonima **prioritetno koriste za uređenje i regulaciju vodotoka i zaštitu od poplava u općinama ugroženih od pojave poplava.**

Stoga, Predsjedništvo Skupštine Saveza je usvojilo pomenutu inicijativu i Federalnom ministarstvu poljoprivrede, vodoprivrede i šumarstva dostavilo prijedlog izmjena i dopuna Zakona o vodama koje se odnose na dopunu člana 178. stav 2 gdje je propisano obavezno namjensko trošenje sredstava od vodne naknade koji pripadaju kantonu, ali bez navođenja sredstava za prioritetno uređenje i regulaciju vodotoka. Predloženim izmjenama bi se na pravi način riješilo pitanje izlivanja rijeka i uopšte pojava poplava u općinama koje imaju takve probleme.

SAVEZ OPĆINA I GRADOVA FBIH UPUTIO INICIJATIVU ZA IZMJENE I DOPUNE ZAKONA O ZAŠTITI I SPAŠAVANJU LJUDI I MATERIJALNIH DOBARA OD PRIRODNIH I DRUGIH NESREĆA

SARAJEVO, 23. mart/ožujak – Savez općina i gradova Federacije Bosne i Hercegovine uputio je Federalnoj upravi civilne zaštite inicijativu za izmjene i dopune Zakona o zaštiti i spašavanju ljudi i materijalnih dobara od prirodnih i drugih nesreća.

Zahtjev je upućen danas, 23. marta/ožujka, a shodno zaključku Predsjedništva Skupštine Saveza.

Naime, na **Trinaestoj sjednici Predsjedništva Skupštine Saveza općina i gradova**

Federacije Bosne i Hercegovine, koja je održana 24.02.2011. godine u Bugojnu podržana je inicijativa Općine Ilidža za dopunom Zakona o zaštiti i spašavanju ljudi i materijalnih dobara od prirodnih i drugih nesreća.

Izmjenom Zakona o zaštiti i spašavanju ljudi i materijalnih dobara od prirodnih i drugih nesreća **traži se da se povećaju sredstva potrebna za finansiranje preventivnih mjera zaštite i spašavanja sa 20% na 40%.**

Sadašnjim odredbama tog zakona općine su dovedene u situaciju da imaju značajna sredstva u budžetima koja se ne mogu utrošiti za namjene koje su najpotrebnije a to su uređenje i regulacija vodotoka kao jedna od najprioritetnijih preventivnih mjera zaštite i spašavanja za općine koje su ugrožene poplavama.

Stoga, Predsjedništvo Skupštine Saveza usvojilo je pomenutu inicijativu i Federalnoj upravi civilne zaštite dostavilo prijedlog izmjena i dopuna Zakona o zaštiti i spašavanju ljudi i materijalnih dobara od prirodnih i drugih nesreća koje se odnose na izmjenu člana 184. iz razloga što općine primjenom važeće zakonske odredbe nailaze na poteškoće pri praktičnoj realizaciji utroška predviđenih budžetskih sredstava.

CAZIN POČINJE REALIZACIJU PROJEKTA IZGRADNJE KANALIZACIONOG SISTEMA



CAZIN, 22. mart/ožujak – Općina Cazin planira realizaciju velikog projekta izgradnje centralnog kanalizacionog sistema koji je predviđen i Strateškim planom za vode, zaštitu okoliša i komunalnu djelatnost Općine.

U prvoj fazi realizacije ovog projekta planirana je izgradnja kolektora i postrojenja za pročišćavanje vode te sekundarnih priključaka čija

vrijednost bi se trebala kretati oko 30 miliona KM.

Izrađen je glavni projekt kolektora, a potrebno je uraditi studiju izvodljivosti koja će pokazati koliko će biti potrebno finansijskih sredstava za njegovu realizaciju te druge tehničke detalje kao što su dužina kolektora, lokacija postrojenja za pročišćavanje.

Budući da Općina nema sredstava za financiranje projekta ovakve vrijednosti aplicirali su prema različitim donatorima. Imali su razgovore i sa međunarodnim finansijskim institucijama te već imaju naznake da bi mogli dobiti podršku pri izradi ovog kanalizacionog sistema.

Uvođenjem decentraliziranog kanalizacionog sistema i uspostavom sistema pročišćavanja vode - pet vodocrpilišta koja su direktno ugrožena zagađivanjem bila bi spašena, a bili bi eliminirani i drugi negativni efekti zagađenja. Ovim bi zaštitili podzemene vode iz kojih crpe vodu, ali i površinske. S obzirom na visinu sredstava koja su potrebna za realizaciju ovog projekta, on bi se mogao nazvati i historijskim.

NOVI TRAVNIK POKREĆE NOVI CIKLUS PREUREĐENJA UŽEG GRADSKOG PODRUČJA



NOVI TRAVNIK, 22. mart/ožujak – Raspisivanjem javnog poziva za izradu urbanističkih i regulacionih planova, općina Novi Travnik priprema se za preuređenje užeg gradskog područja, koje nije obnavljano od samog osnivanja grada.

Prostorni plan Novog Travnika za period od 2002. do 2020. godine usvojen je na Općinskom vijeću, a sada se kreće u izradu urbanističkih planova

za pojedine mikrolokacije. Tako je nedavno općina objavila poziv za izradu urbanističkog projekta Autobuske stanice, urbanističkog projekta Trgovačkog centra "Zelena pijaca", te za izradu regulacionog plana za stambeno-poslovnu zonu Trg Federacije u ulici Kalinska.

Planovi se odnose na središnji dio grada koji je do sada bio neuređen. Cilj lokalne zajednice jeste stvaranje ljepše slike grada i pokretanje novih infrastrukturnih projekata.

Kao prioritet se nameće prostor Autobuske stanice u Novom Travniku, koji osim perona nema prateću infrastrukturu. Povoljna lokacija za izgradnju jeste i prostor u blizini nekadašnje zelene pijace u centru grada.

Treći dio poziva odnosi se na izradu regulacionog plana za poslovno-stambenu zonu, čiji bi se objekti trebali prilagoditi postojećem ambijentu.

Novi Travnik je nastao u drugoj polovini dvadesetog vijeka, i to ne stihijski, već prema unaprijed definisanom urbanističkom planu za smještaj radnika tvornice MMK "Bratstvo".

Grad je dobio naziv prema obližnjem starom gradu Travniku, da bi 1981. godine bio preimenovan je u Pucarevo, po Đuri Pucaru, partizanskom heroju iz Drugog svjetskog rata. Staro, izvorno ime Novi Travnik vraćeno je 1990. godine. Grad je tokom ratnih dešavanja u BiH početkom devedesetih godina prošlog vijeka pretrpio velika oštećenja, zbog čega brojni objekti još čekaju na obnovu.

VELIKA KLADUŠA PRISTUPA IZRADI STUDIJE ZA IZGRADNJU SORTIRNICE I KOMPOSTANE



VELIKA KLADUŠA, 18. mart/ožujak – U kabinetu Općinskog načelnika upriličeno je danas potpisivanje Ugovora o izradi studije "Sortirница Velika Kladuša". Potpisivanju su prisustvovali općinski načelnik Admil Mulalić, direktor JKUP "Komunalije" Almir Pajazetović i Željko Blažeka direktor Instituta za ekološki inženjering iz Maribora. Predmet ugovora je izrada Studije za izgradnju

sortirnice i kompostane u Velikoj Kladuši.

Ugovorom je određena i cijena za izradu studije za izgradnju koja iznosi 1.700 EUR ili 3.315 KM, a koju će zajedno isfinansirati Općina Velika Kladuša i JKUP "Komunalije" d.o.o. Velika Kladuša sa udjelima od po 50%. Ugovorom je zaključeno da metodologija rada i studija po završetku trebaju da odgovaraju propisima i standardima Evropske unije, tako da ista studija može poslužiti prilikom aplikacija za razne programe i strateška ulaganja za izgradnju sortirnice i kompostane u Velikoj Kladuši. Rok za izradu Studije iznosi 30 dana od današnjeg potpisivanja ugovora.

Prema riječima direktora JKUP "Komunalije" Almira Pajazetovića, izgradnjom sortirnice i kompostane riješit će se problem Velike Kladuše koji se odnosi na sortiranje, reciklažu i obradu otpada.

"Količina otpada bi se znatno smanjila, a istodobno sa sortiranjem i odvajanjem frakcija te bi se sirovine iznova mogle upotrijebiti", rekao je Pajazetović.

Željko Blažeka, direktor Instituta za ekološki inženjering d.o.o. Maribor, istaknuo je zadovoljstvo potpisanim Ugovorom, te se osvrnuo na kvalitetan rad Instituta u Sloveniji, gdje su izgradili većinu takvih instalacija, koje su sve počele na ovakvim Studijama.

Po završetku sastanka općinski načelnik Admil Mulalić rekao je da vjeruje u profesionalnost obje strane, da je izuzetno zadovoljan potpisanim ugovorom, te da će ovakva Studija dati veliki doprinos zaštiti okoliša.

Studija će obuhvatati tehnologiju prikazanu u varijantama, potrebne strojeve, te njihovu usporedbu, potrebnu infrastrukturu, izračune količine frakcija, investicijske troškove te mogućnost fazne izgradnje.



MEĐUNARODNI OPĆINSKI SAJAM NEXPO – NALAS

Sarajevo, 10.-11. mart/ožujak 2011

Deklaracija o Lokalnim vlastima koje se suočavaju sa budućnošću: Dobra uprava, socijalna uključenost i evropske integracije

Mi, načelnici i izabrani predstavnici lokalnih i regionalnih vlasti jugoistočne Evrope, koji smo se sastali u Sarajevu povodom NEXPO Međunarodnog općinskog sajma organizovanog od strane NALAS-a, složili smo se o sljedećoj Deklaraciji:

Zemlje i narodi jugoistočne Evrope trebaju zauzeti svoje odgovarajuće mjesto, vrlo brzo, u Evropskoj uniji. To će označiti drugi veliki korak ka ujedinjavanju našeg kontinenta na taj način ojačavajući naše zajedničke ciljeve mira, stabilnosti i održivog napretka.

Da bi perspektiva članstva u EU ostala vjerovatna i privlačna našim građanima,

- EU treba postaviti realistični ciljni vremenski okvir i smjernice za svaku državu, uzimajući u obzir njenu situaciju i na osnovi toga da se na vrijeme trebaju poduzeti neophodni koraci za ispunjavanje kriterija za članstvo, i
- Svaka zemlja treba poduzeti sve neophodne korake, gdje svaki nivo vlasti igra svoju ulogu

Trenutno stanje neizvjesnosti, ukoliko mu se dozvoli da se nastavi, će biti štetno i potencijalno opasno.

Naša zajednička evropska misija, svima nama – Evropskoj uniji i njenim državama članicama, centralnim i lokalnim vlastima naše regije, i našim građanima i partnerima, nameće teške odgovornosti.

Naš poziv Evropskoj uniji – uključite lokalne vlasti!

Međutim, trenutno nam izgleda da institucije EU potcjenjuju esencijalnu ulogu lokalnih vlasti regije u pripremi za EU integracije. Na primjer, nedavno Saopćenje Evropske komisije, “Strategija proširenja i glavni izazovi 2010-2011”, gotovo da ne spominje lokalne vlasti, istovremeno opravdano ističući ulogu civilnog društva i organizacija iz lokalne zajednice. Stoga pozivamo institucije EU:

- Da uključe dimenziju lokalne vlasti u svoje strateško i operativno planiranje za proširenje EU
- Da uključe lokalnu vlast, naročito preko naših nacionalnih asocijacija i njihove mreže NALAS, u relevantne konsultacije i dijaloge
- Da osiguraju da su relevantni programi finansiranja vezani za pridruživanje dostupni za podršku lokalnim vlastima u pripremi za pridruživanje i postizanje visokokvalitetnog razvoja

Tražimo od **Komiteta regiona** da poboljša koordinaciju svog rada sa našom regijom, koji se trenutno odvija u četiri odvojene radne grupe i da uključi NALAS kao posmatrača u cilju pomoći u identifikaciji zajedničkih pitanja i promoviranja međusobnog učenja.

Šta nam je potrebno od naših nacionalnih vlasti

U našoj regiji, procesi decentralizacije su nepotpuni i neadekvatni. Princip subsidijarnosti na nivou političkog procesa odlučivanja, kao fundamentalni princip decentralizacije, se ne poštuje toliko koliko bi trebao. Prenos ovlasti na lokalni nivo često nije praćen prenosom neophodnih resursa za sprovođenje istih.

Nadalje, lokalne vlasti – kroz naše asocijacije lokalnih vlasti – nisu dovoljno konsultirane o aranžmanima i pripremama za pridruživanje Evropskoj uniji, uključujući o predpristupnim programima finansiranja.

Mi stoga tražimo od naših centralnih vlasti:

- Da ubrzaju proces decentralizacije, sa prenosom neophodnih ovlasti, finansijskih i ljudskih resursa
- Da uključe asocijacije lokalnih vlasti u sve stadije procesa decentralizacije, finansijsko odlučivanje i pripreme za članstvo u EU
- Da nastave konsultacije i saradnju sa Vijećem Evrope čija ekspertiza je esencijalna za prilagođavanje sa evropskim standardima

Naši prijedlozi za predpristupno finansiranje

Kada govorimo o ključnom pitanju predpristupnih finansijskih instrumenata i programa, naročito za period poslije 2013., apelujemo na EU i naše centralne vlasti da implementiraju sljedeće stavke:

- Naše asocijacije lokalnih vlasti, uključujući NALAS, trebaju biti od samog početka uključene u pregovore, konsultacije i postavljanje prioriteta,
- Instrumenti trebaju uključivati specifične prioritete vezane za lokalne vlasti i također trebaju osigurati da je, dimenzija drugih, širih prioriteta lokalnih vlasti (npr. jednake mogućnosti, socijalna uključenost, itd.) jasno identificirana
- Značajan dio predpristupnog finansiranja treba biti posvećen subnacionalnim vlastima, u dogovoru sa centralnim vlastima, da bi im se omogućilo da se ispravno pripreme za članstvo u EU
- U tu svrhu, trebaju postojati specifični programi ili budžetske linije za lokalne i regionalne vlasti, sa procesima prilagođenim njihovoj ulozi i situaciji demokratskih javnih ustanova
- Potrebno je napraviti odredbu da se trebaju finansirati jedinice za tehničku podršku lokalnoj vlasti, kojima upravljaju asocijacije lokalnih vlasti, da bi se pružila podrška lokalnim vlastima u izradi kvalitetnih projektnih prijedloga

U smjeru pridruživanja EU – izazovi za lokalne vlasti

Za nas, pitanja dobre uprave i EU integracija su povezana – ona predstavljaju dvije strane istog novčića. Susrećemo se sa najmanje četiri glavna izazova u pripremi za članstvo u EU:

- Vrlo veliki dio zakona i pravila EU se mora implementirati od strane lokalnih vlasti ili ima direktan uticaj na njih
- Kao vlasti najbliže građanima, trebamo izgraditi “evropsku dimenziju” u našem radu, približavajući Evropu našim građanima, uključujući ih u velika pitanja koja se tiču EU i dajući im dobre informacije
- Sveukupna kvaliteta naših lokalnih uprava se treba povećati da bi se ispunili standardi dobre uprave, efikasno upravljalo resursima, pružale dobre javne usluge, postigli pozitivni rezultati za naše građane i privukle investicije
- Naše strategije lokalnog razvoja trebaju biti dobro isplanirane, participativne i orijentisane na građane te moći na najbolji način iskoristiti teritorijalne programe finansiranja (IPA, strukturni fondovi, itd.)

Da bi pomogle u suočavanju sa ovim izazovima, lokalne vlasti moraju i same napraviti mnoge korake, uključujući izradu i implementaciju svojih sopstvenih Akcionih planova za EU integracije. Konkretno, trebamo osigurati da je kvalitet lokalne uprave, u svim svojim dimenzijama, poboljšan.

Inovacija, uključivanje i dobra uprava

Svrha demokratske lokalne vlasti je da obezbijedi usluge i razvoj u interesu svih građana, bez diskriminacije i uopšte da promoviše njihovo blagostanje. Ovo zahtijeva konstantno učenje, inovaciju i poboljšanje od strane lokalnih vlasti.

U tom cilju, još jednom naglašavamo važnost Evropske povelje o lokalnoj samoupravi, koja definiše osnovne principe lokalne samouprave, čak i ako veliki broj lokalnih vlasti i dalje ne uspijeva u potpunosti da je sprovede. U tom kontekstu, naglašavamo važnost Kongresa lokalnih i regionalnih vlasti i potrebu da se podstakne i održi sudjelovanje svih njegovih članova.

Povelja je sada upotunjena Strategijom o inovaciji i dobrom upravljanju na

lokalnom nivou Vijeća Evrope, koja definiše 12 glavnih principa dobrog upravljanja i koja podrazumijeva zajedničku posvećenost centralne vlasti i nacionalne asocijacije lokalnih vlasti ostvarenju njenih ciljeva.

Izražavamo svoju podršku Strategiji i našu posvećenost njenim principima i ohrabrujemo naše asocijacije lokalne vlasti da rade sa svojim članovima i centralnim vlastima na ispunjenju Strategije. Također podržavamo novi sistem nagrađivanja za lokalne vlasti koje implementiraju Strategiju – “Evropsko priznanje izvrsnosti u upravljanju”, ELOGE.

Ovdje u Sarajevu smo se posebno fokusirali na pitanje socijalne uključenosti. Strategija o inovaciji i dobrom upravljanju uključuje princip “ljudskih prava, kulturne različitosti i socijalne kohezije, da bi se osiguralo da su svi građani zaštićeni i da se ni protiv koga ne vrši diskriminacija ili ga se isključuje.”

Naglašavamo potrebu da se strateški promoviše ravnopravnost među spolovima, uključivanje civilnog društva i da se osigura da će ne samo sve manjinske i ugrožene grupe biti zaštićene, već da će im se na pozitivan način pomoći da sudjeluju u lokalnim pitanjima i odlučivanju. Pitanje socijalne uključenosti je od posebnog značaja u odnosu na Rome i druge slične manjine, koje su, u praksi, ispaštale dosta dugoročne diskriminacije i isključivanja.

Bratimljenje i partnerstva za mir i razvoj

Bratimljenje lokalnih vlasti je, već preko 60 godina, predstavljalo moćno sredstvo zbližavanja naroda s različitih strana nacionalnih granica da bi se promovirala ujedinjena Evropa koja je zasnovana na miru, međusobnom razumijevanju, stabilnosti i prosperitetu.

U posljednjih nekoliko decenija, ovo je upotpunjeno pristupom koji bratimljenje posmatra kao alatku za lokalni razvoj, koja pomaže da se donese ekonomski, društveni i ekološki napredak, poboljšaju javne usluge i uprava i razviju kapaciteti lokalnih vlasti.

Preko sestrinskog grada i prijateljskih partnerstava, evropske lokalne vlasti su se također udružile sa svojim kolegama sa drugih kontinenata da bi promovisale vrijednosti mira, tolerancije i transkulturalnog razumijevanja, kao i praktične koristi koje nastaju putem učenja i razmjene među ravnopravnim subjektima.

Tražimo od CEMR-a, NALAS-a i naših nacionalnih asocijacija da ohrabre i podrže učešće naših lokalnih vlasti u ovim raznovrsnim oblicima međudržavnog bratimljenja i saradnje, u skladu sa njihovim prioritetima.

Također apeliramo na Evropsku uniju da održi i poveća svoju podršku različitim modalitetima bratimljenja lokalnih vlasti i međudržavnih partnerstava, prilagođenih modernim potrebama i uslovima, za period nakon 2013. godine.

Zaključak

Zahvaljujemo NALAS-u, zajedno sa Gradonačelnikom grada Sarajeva, Vijeću Evrope i svim drugim partnerima za organizaciju ove blagovremene i važne Konferencije.

Pozivamo Evropsku komisiju, Evropski parlament i Komitet regiona, Vijeće Evrope, zajedno sa drugim međunarodnim organizacijama i asocijacijama, da pozitivno razmotre ovu Deklaraciju i osiguraju njeno odgovarajuće praćenje.

Pozivamo NALAS, CEMR i druge nacionalne asocijacije lokalnih i regionalnih vlasti da distribuiraju ovu Deklaraciju u što je moguće većoj mjeri i da podrže i promovišu njene zaključke.

Najava obilježavanja Dana općina

- **06. april/travanj - Dan Grada Sarajeva** i obilježava se kao sjećanje na oslobođenja grada 1945. godine.
- **06. april/travanj - Dan Općine Breza.** To je dan oslobođenja Breze od fašista iz II. svjetskog rata 1945. godine.
- **15. april/travanj - Dan Općine Kakanj.** Radi se o prvom spominjanju imena Kakanj u pisanim izvorima. Na taj dan 1392. godine kralj Stjepan Dabiša darovao je vojvodi Hrvoju Vukčiću dva sela u okolini Kaknja. Općinsko vijeće Kakanj je 14. marta 1996. godine odlučilo da se 15. april proglasi Danom Općine Kakanj.
- **24. april/travanj – Bosna i Hercegovina** je 24. aprila/travnja 2002. godine kao punopravna članica primljena u **Vijeće Evrope**, čime je postala 44. članica tog tijela.
- **28. april/travanj - Dan Općine Vitez.** Ovaj datum se obilježava kao dan Općine jer je tog dana 1952. godine Narodna skupština NR BiH donijela Zakon kojim je formirana Općina Vitez.

